



Fatschas cuntentas: Il Chor dils Larischs ha undrau il dirigent partent Marcus Zarn (sen) e fatg beinvegni al niev dirigent Mathias Müller.

FOTO C. BUXHOFER

# Ils Larischs undran Marcus Zarn

Mathias Müller supren la direcziun dil Chor dils Larischs

DA MARTIN CABALZAR

■ **Suenter haver dirigiu cun grond success il Chor dils Larischs duront buca meins che 32 onns ha Marcus Zarn (Landquart) remess la bitgetta. Sco successur ha il Chor dils Larischs tscharniu il giuven dirigent Mathias Müller (Cuera).** En ina pinta da cumiau che ha giu liug da cuort ella Tschaleraria episcopala (Hofkelleri) a Cuera ha il Chor dils Larischs engraziu al dirigent partent Marcus Zarn per sia gronda lavur, per sia perseveranza e per sia suveranità musicala. Sco quei ch'il collega e cantatur Giacumin Caviezel ha menziunau en sia undrientscha plein humor ha Marcus Zarn fatg cul chor en quels 32 onns 1250 emprovas, dau 150 concertse priu part a 1400 sentupadas. Restadas seigien bunas regurdientschas da nundumbrevilas bialas uras da cant e cumpignia. Grazia a Marcus Zarn ei il Chor dils Larischs daventaus in dils chors d'elita dalla scena cantica dil Grischun. Ch'el hagi pudiu terminar sia carriera da dirigent dils Larischs cun dus concertes fetg impressiunonts a Falera ed a Vaz-sut – ensemen cul Chor viril da Falera che vegn medemamein

dirigiu da Marcus Zarn ed il cantatur professiunal Peter Gailliard che Zarn ha promoviu – seigi stau in mussament dapli che Marcus Zarn seigi staus engaschus entochen il davos mument per ina cultura da cant sin fetg ault nivel, menziunescha igl actual parsura René Spescha. Sco pign segn da reconuschienscha ha il dirigent partent astgau retscheiver in bon per in concert el Center da cant e cultura a Lucerna. L'undrientscha ei vegnida enramada da produziuns canticas dil Chor dils Larischs sut la nova direcziun, aschia che Marcus Zarn ha saviu seperschuader ch'el hagi survegniu cun Mathias Müller in dign successur.

Dil reminent ei il Chor dils Larischs vegniu fundaus igl onn 1970 cun 11 cantadurs. Sco emprem dirigent ha Gion Giusep Derungs (Surcasti/Cuera) smenau la bitgetta. Oz dumbra il chor 18 commembers, las emprovas han liug mintgama il margis sera ella Tschaleraria a Cuera. Il repertori dil chor ei vasts e cumpeggia ton litteratura profana sco sacrala. Cantau vegn en tuts quater lungatgs nazionals, denton era per latin ed engles. Preferenza ha denton la canzun romontscha. La pinta formaziun cantica se presenta cun-

zun tier giubileums, fiastas, exposiziuns e fiastas da cant.

## In dirigent engaschau e stimau seretila

Cun Marcus Zarn che ha cumpleiniu igl onn vargau 70 onns passa in dils pli gronds e talentai dirigents laics che ha influenzau essenzialmein la cultura da cant dil Grischun successivamein dalla tribuna. Sper siu engaschament cumplein da rodund 40 onns sco scolast secundar a Lanquart eis el s'engaschus cun anim e perseveranza nunstunclenteivla sco dirigent, seigi quei da chors regiunals ni dil vitg. Aschia ha Marcus Zarn dirigiu buca meins che 32 onns il Chor dils Larischs, 32 onns il Chor viril da Landquart, 27 onns il Chor viril Lumnezia, 16 onns il Chor baselgia da Zezras e dapi 6 onns il Chor viril da Falera. Dasperas ha Marcus Zarn era fatg part dalla cummissiun da musica cantunala e federala e staus a disposiziun sco expert. Propi egl element era Marcus Zarn cunzun era sco dirigent da fiasta ed ad el reusseva ei tgunschamein da muentar ina entira sala da cantar da cuminonza. Marcus Zarn astga mirar anavos cun satisfaziun sin ina veta cumpleinida ed encorunda da success en favur dil cant.

## GLION

# Concert unic cun «Jolly and the Flytrap»

(abc) **Dapi exact 20 onns ein els ensemble sco formaziun, ils «tschappamustgas» dad Engelberg. Igl onn vargau, il zercladur 2005, ei «Jolly and the Flytrap», la band dalla Sursilvania, stada l'emprema gada en Surselva.** Ella ha giu in publicum schi grondius ch'els musicists ein sedecidi d'integrar Glion en lur program da turnea dil 2006. Sonda proxima eis ei pia schi lunsch: Glion e Cuera ein ils sulets loghens dil Grischun ch'els Jollys visetan. Glion semetera en retscha cun prominenza da cultura

sco Turitg, Basilea, Berna, Sogn Gagl, Lucerna e Zug. Als Jollys ha il publicum da Glion plaschiu aschi bein ch'els han vuliu turnar. Il concert dils Jolly and the Flytrap ha liug egl anteriur luvratori digl uffeci da construcziun bassa ella via Santeri. En halla han rodund 200 persunas plaz, e quels vegnan ad esser occupai tuts, pertgei la band dalla Svizra centrala vala sco tip confidenzial.

Tgi che ha udiu inagada ils «tschappamustgas» ei fascinaus. Benedetto Vigne, igl expert da musica da Radio rumantsch

e collaboratur liber dil «Tagesanzeiger» da Turitg, ha scret avon zacons onns ch'els «Jollys» dad Engelberg seigien «sontgets» el drete senn dil plaid. Els ein pia pigns stars zuppai. Reconuschi ein els en scadin cass ella scena da musica cun lur musica genuina dil stil «Folk'n'Roll». Els experimenteschon novas vias, novs ritems, ein denton originals in sco l'auto. Ed els han in publicum fideivel che selai entusiasmar dils songs. **Il concert da Jolly and the Flytrap ha liug sonda-sera, allas 20.30 ella via Santeri, sur la garascha Aldo Beeli.**



La gruppa Jolly and the Flytraps va dapi 20 onns sin turnea atras la Svizra. Il Grischun enconuschan ils muntagnards dad Engelberg fetg bein. Sonda ein els a Glion.

MAD

# Igl 1. Forum Surselva ei vendius ora

■ **(cp) Dapli che 170 Persunas ein s'annunziadas pigl 1. Forum Surselva. En mo duas jamnas ei igl 1. Forum Surselva staus vendius ora. Quella occurrenza ch'ei nova per la Surselva ha liug ils 10 da november 2006 ella halla dall'Air Grischa a Tavanasa.** Tiel tema «La Surselva el center dall'Europa» vegnan igl anteriur cusseglier federal Joseph Deiss, Hennig Wacker dalla fatschenta Stallinger Swisstimber AG a Domat, Simon Jacomet, il svilupader da skis, ed il cosmonaut Werner Schäppi a s'exprimer. Ella runda da discussiun PLUS survegn mintga referent in partenari ord sia reit. Il referent dalla regiun vegn ad esser presents cun in partenari naziunal, ils referants d'ordvart la regiun cun partenaris ord la regiun. La runda da discussiun PLUS duei mussar figurativ l'impurtonza da reits naziunals ed internaziunals per far fatschenta gest era en ina regiun muntagnarda. Moderadas vegnan la runda da discussiun PLUS sco era l'entira occurrenza dil re-

dactur da Radio Grischa Marcel Melcher.

## Igl 1. Forum Surselva frunta sin grond interess

Pli che 170 persunas ein s'annunziadas pigl 1. Forum Surselva dils 10 da november 2006. Quella cefra surpasa las spetgas dils organisaturs. Il forum «niev» se-drezza en emprema lingia a tut ils surprindiders (incl. purs) dalla Surselva, denton era als purtaders da decisiuns ord economia, politica e societad. Enstagl dil helicopter duein ils patratgs e las ideas dils participonts «sgular» quei suentermiezgi naven dalla basa dalla Air Grischa a Tavanasa. Igl 1. Forum Surselva porchia ina plattafuorma per sviluppar novas ideas, per anflar novs contacts e tgi-rar ils existents.

Dapli informaziuns tier igl 1. Forum Surselva ein d'anflar egl internet sut [www.forumsurselva.ch](http://www.forumsurselva.ch).

# Eufonist e marimbist ella baselgia catolica da Sagogn

■ **(abc) Omisdu ein virtuos sin lur instruments. In d'els, Thomas Rüedi, vala era sco arranschader reconuschiu internaziunalmein. L'auto ei virtuos sil marimbafon. Ils dus instruments culls tuns contrastonts, quel dalla percussiu ed il cumplein digl eufoni, s'uneschan en in concert che ha liug dumengia proxima a Sagogn.** Thomas Rüedi e Raphael Christen ein savens sin viadi. Els ein solists virtuos sin lur instruments. Igl eufoni ed il ritem dalla percussiu ein integrati en in orchester sinfonic ni en ina brass band. Omisdu musicists concerteschon denton era persuls. Ins sa strusch s'immaginar ch'els dus instruments, ch'ei da principi contrastonts e jasters in viers l'auto, harmoniseschan tuttina. Ord ina sentupada casuala duront in'emprova han Thomas Rüedi e Raphael Christen sviluppu l'idea d'experimentar in program communabel. Igl ei stau l'idea inziala per ina turnea cul tel «Synthesis».



Raphael Christen (davos) e Thomas Rüedi s'audan denter ils megliers ell'Europa sin lur instruments. Dumengia a Sagogn dattan els il sulet concert el Grischun.

MAD

Ils dus virtuos extraordinaris sepresentan dumengia proxima cun in sulet concert en Surselva. Ils dus instruments contrastonts s'uneschan sco tun cumplein, la «sintesa» derasa ina harmonia ch'ins spitgass buc. Il cosmos da tuns da «Synthesis» tonscha naven dil choral sur la musica populara dall'America latina, musica dall'Europa dil nord e digl ost. El concert che ha liug ella baselgia catolica da Sagogn

sa il publicum denton era tedlar ovras classicas da Debussy, Astor Piazzolla e Gabriel Fauré. Oriundamein ei la gronda part dil repertori da tocs vegniu scret per autras cumbinaziuns d'instruments. Igl arranschader Thomas Christen ha stuiu adattar els per eufoni e marimbafon. In concert unic finescha culla cumposiziun «Ellipse 1» ch'il musicist Thüring Bräm ha fatg aposta pigl ensemble Synthesis Thomas Rüedi e Raphael Christen.

**Il concert da Synthesis ha liug dumengia, ils 5-11, allas 17.00, ella baselgia catolica da Sagogn.**

# TALUN D'EMPUSTAZIUN

## LA QUOTIDIANA

Jau abunesch La Quotidiana

- 2 mais frs 25.- (abunament d'emprova d'ina gia)
- 6 mais frs 86.-
- 12 mais frs 163.-
- 24 mais frs 293.-

Num \_\_\_\_\_  
 Prenom \_\_\_\_\_  
 Adressa \_\_\_\_\_  
 NP/Lieu \_\_\_\_\_  
 Data \_\_\_\_\_ Suttascripziun \_\_\_\_\_  
 Tel.-nr. \_\_\_\_\_

P. pl. trametter a:  
 Südostschweiz Presse AG, servetsch d'abunaments, Via da la Caserna 1, 7007 Cuira  
 Empustaziun telefonica: 081 255 55 00